

Na osnovu člana 16. stav 4. Zakona o Vladi Zeničko-dobojskog kantona-Prečišćeni tekst ("Službene novine Zeničko-dobojskog kantona" broj 7/10), na prijedlog Ministarstva za boračka pitanja, Vlada Zeničko-dobojskog kantona, na 167. sjednici, održanoj 02.11.2018.godine, donosi

ZAKLJUČAK

I.

Prihvata se Mišljenje Ministarstva za boračka pitanja Zeničko-dobojskog kantona broj: 13-02-14410-2/18 od 27.10.2018. godine u vezi Inicijative zastupnice Draženke Subašić za izmjene Zakona o pravima branilaca i članova njihovih porodica („Službene novine F BiH“, broj: 33/04, 56/05, 70/07, 9/10 i 90/17), koji je sastavni dio ovog Zaključka.

II.

Zaključak sa Mišljenjem Ministarstva za boračka pitanja Zeničko-dobojskog kantona upućuje se u dalju skupštinsku proceduru.

III.

Zaključak stupa na snagu danom donošenja.

Broj: 02-_____/18.

Datum, 02.11.2018. godine.

Z e n i c a

PREMIJER

Miralem Galijašević

DOSTAVLJENO:

1x Stručna služba Skupštine Kantona,

1x Ministarstvo za boračka pitanja,

1x a/a.



Broj: 13/02-02-14410-2/18

Zenica, 27.10.2018.godine

U postupku po dopisu Stručne službe Skupštine Zeničko-dobojskog kantona, br. 01-02-14410/18, a u vezi Inicijative zastupnice Skupštine Kantona Draženke Subašić za izmjene Zakona o pravima branilaca i članova njihovih porodica ("Službene novine FBiH" br. 33/04, 56/05, 70/07, 9/10 i 90/17), Ministarstvo za boračka pitanja daje sljedeće

MIŠLJENJE

Dopisom Stručne službe Skupštine Zeničko-dobojskog kantona, br. 01-02-14410/18 od 19.09.2018.g., primjerak kojeg je dostavljen na znanje Ministarstvu za boračka pitanja Zeničko-dobojskog kantona, od Vlade Kantona zatraženo je mišljenje po Inicijativi zastupnice Skupštine Kantona Draženke Subašić za izmjenu Zakona o pravima branilaca i članova njihovih porodica ("Službene novine FBiH" br. 33/04, 56/05, 70/07, 9/10 i 90/17), tačnije člana 9.stav 2. Zakona kojim je navedeno utvrđivanje prava na ličnu invalidninu za osobe kod kojih je nastupilo oštećenje organizma usljed psihosomatskih oštećenja i poremećaja i manifestovalo se do 23.12.1997.g., te člana 35. stav 1. istog zakona radi pomjeranja roka za pokretanje procedure priznavanja prava, jer se ista na osnovu važećeg Zakona mogla pokretati do 19.06.2007.godine.

Zastupnica je u Inicijativi dala i šire obrazloženje:

"Ja za danas imam jednu inicijativu koja se odnosi na inicijativu za izmjene Zakona o pravima branilaca i članova njihovih porodica. Radi se o federalnom propisu, na osnovu člana 144. Poslovnika Predstavničkog doma parlamenta FBiH kojim je propisano da inicijativu za donošenje zakona mogu pokretati skupštine kantona podnosim inicijativu prema Skupštini Kantona za pokretanje procedure izmjene člana 9. stav 5. Zakona o pravima branilaca i članova njihovih porodica, "Sl. Novine FBiH", u smislu kojem je navedeno utvrđivanje prava na ličnu invalidninu za osobe kod kojih je nastupilo oštećenje organizma usljed psihosomatskih oštećenja i poremećaja manifestovalo do 23.12.1997.godine. S obzirom na prihvaćena mišljenja i dokaze da se PTSP javlja mnogo kasnije predlažem izmjenu ovog člana u smislu da se ovaj rok pomjeri na razuman rok uz konsultaciju sa stručnjacima za ovu oblast tj. oblast koji tretiraju PTSP usred ratne traume. Osim navednog člana predlažem i izmjenu člana 35. stav 1. istog zakona radi pomjeranja roka za pokretanje procedure priznavanja prava jer se ista na osnovu važećeg zakona mogla pokretati do 19.06.2007.godine. Naime. postoji udruženje oboljelih od PTSP-a Veterani iz Zavidovića koji se već 10-tak godina bore u ovom kontekstu koji sam već navela. Mislim da će se i stručna javnost složiti u tome da se o samom terminu PTSP-a koji se kao javlja kao posttraumatski simptomi se manifestuju i dugi niz godina nakon ratne traume, te je potrebno da se u ovaj zakon koji je krovni zakon izmijeni evo u ova dva člana. Do sada su oni upućivali inicijative znači kako udruženje prema Federalnom ministarstvu za boračka pitanja na što su dobili uvijek potvrđan odgovor u smislu da će se ta inicijativa uzeti u razmatranje kada Vlada planira izmjene tog zakona, što se evo nije desilo u ovom mandatu niti se apsolutno može pretpostaviti kada bi se to moglo desiti. Istu inicijativu u njihovo ime sam podnosila i ja u Domu naroda dobila sam apsolutno isti odgovor. Evo sada kao još jedan od mehanizama tražim da Skupština ZDK podnese inicijativu prema Federalnom parlamentu kako bi se ova prolematika riješila. Ono što su u međuvremenu oni, korisnici ovog udruženja uspjeli postići da su dobili znači razumijevanje i stručne javnosti prema njihovim navodima, razumijevanje našeg ministra Brenje koji se apsolutno upoznat sa ovom problematikom i sa stručne strane može dati određena razmišljanja i prijedloge, međutim do same izmjene zakona kako bi ovi ljudi mogli ostvariti prava evo još nije došlo, pa se nadam da će sljedeći saziv skupštine razmotriti ovu inicijativu i kao takvu je uputiti prema Parlamentu FBiH."

U vezi sa dostavljenom Inicijativom Ministarstvo za boračka pitanja daje slijedeće mišljenje:

U skladu sa praksom koju primjenjujemo u svim slučajevima prijedloga donošenja ili izmjena i dopuna propisa iz oblasti prava branilaca i članova njihovih porodica, Ministarstvo je i u postupku po podnesenoj Inicijativi zastupnice Subašić o istoj zatražilo mišljenje branilačkih udruženja sa područja Kantona.

Udruženja koja su dostavila odgovor (pet od jedanaest, primjerci u prilogu) u istim su uglavnom navela stav da se sva pitanja kojima se predlaže uvođenje nekog prava ili promjena obima i uvjeta korištenja već utvrđenih prava branilaca i članova njihovih porodica, trebaju rješavati u saradnji i putem branilačkih udruženja. Ovo je i stav Ministarstva za boračka pitanja, kojeg smo iznosili i u svim ranijim prijedlozima i inicijativama podnesenim u tom smislu

Stava smo da su izmjene i dopune Zakona o pravima branilaca i članova njihovih porodica, u nizu odredbi neophodne zbog nezadovoljstva pojedinih kategorija pripadnika branilačke populacije izraženih u postupku donošenja Federalnog zakona o demobiliziranim braniocima, utvrđenog od strane Vlade Federacije 28.06.2018.g., a usvojenog u domovima Parlamenta Federacije u julu u različitim tekstovima, čije se usaglašavanje očekuje.

S tim u vezi nismo spremni podržati bilo kakve inicijative za izmjenu pojedinih odredbi Zakona o pravima branilaca i članova njihovih porodica sve dok ne bude objavljen konačan tekst Zakona o demobiliziranim braniocima (koji, prema tekstu utvrđenom od strane Vlade Federacije, u svom članu 15. reguliše prava demobiliziranih branilaca oboljelih od PTSP-a i predviđa donošenje posebnog podzakonskog akta o realizaciji istog), nakon čega očekujemo da će udruženja branilaca na federalnom nivou pokrenuti inicijativu za izmjenu predmetnog zakona (ili donošenje posebnog zakona o pravima ostalih kategorija branilaca), u okviru kojih može biti, u slučaju potrebe, razmatrano i pitanje dodatnog poboljšanja položaja branilaca oboljelih od PTSP-a. Ministarstvo za boračka pitanja će, u realizaciji obaveza iz podijeljene nadležnosti federalne i kantonalne vlasti u oblasti socijalne politike utvrđene članom III 2.e) Ustava Federacije, u istom procesu imati aktivnu ulogu i o svojim stavovima redovno obavještavati Vladu i Skupštinu Kantona.

S poštovanjem

MINISTAR
Fahrudin Čolaković